

書

姑溪居士文集卷第三十目錄

手簡

與吳思道二首

又與思道三首

與吳思道

再與吳思道二首

又與吳思道五首

與吳主簿禹功

與吳禹功四首

又與禹功三首



頁六

又與禹功四首

姑溪居士文集卷第三十目錄

姑溪居士文集卷第三十

趙郡李之儀端叔

手簡

與吳思道

改月伏惟起居佳勝久欲相款到此遂獲自慰而累辱見顧評
詩論文備盡相予之意既深開警又以知超然特立不愧所聞
為欽幸也方圖造謝遽被書問感佩無已乍遠更祈善自保護

又

佳詞尤畏風味恨未得酬對也異時遇相知者時一出碌輩
妄自低昂適足取輕為累其諸皆望如此既荷見察不罪僭易

又

相別遂見改歲倦游落莫求深夜論詩清話展轉一時之勝了
不可得但常頌秀句以聳動吳越我輩中人尔還家方數日多
事未暇徧作書所以具問稍緩日來起居復何似未獲尋舊夢
以寄雅况區々徒知美才不即相會為可嘆尔

又

別後多在道路故書問無從可致還家見儲子椿則聞動止亦
審書問常往來每荷存記便欲申叙兩經除席哀苦無况加之
在處疲曳稍休方覺如在醉夢間因而不逮想見亮也比來詩
句必愈工嘗作小詞否不妨傳寄使頽廢得以擊節振起也故

都春物漸侈登覽之勝不與他處等定應不乏追隨吟嘯之適
陋邦老病無異凍蠅身世所值乃爾故人當為我一歎也

又

近專遣人奉書常况左右還家忽々易久然雨雪寒甚意况不
佳甚思前日會聚從容之適也于是遽枉書示佩服盛義甚厚
然不知前書何處由滯猶未達又恐今日所貺偶不及尔乍晴
可喜伏審侍奉起居萬福欲見未可得音郵時有一接語之慰
可無憚勞否浸暖千萬加愛

又

相別將半年一向道路然勝處必奉思也到家則為亡者作少

佛事隨分牽迫數日前方因便奉書近來職事必多休暇新詩
佳閱想已盈篋時幸流布使得我拭目為榮何慰如之逼節多
故作書殊草略不盡鄙意當俟後信

又

春間寓書尔後瘡瘍寒疾意外百色見窘幾與茲世泯然况過
從書問交馳之際哉然好音未嘗去耳懷思拳拳畧不間斷似
非形迹所能疎密也忽披手示愧畏不已伏審大暑侍奉佳勝
感浣滋甚區區去此之念已久荏苒至此寔自困耳今已有涯
因幸便道少逢會晤之慰尤非細事百冗殊不逮念

又

別來昏塞無一點佳况每逢來者道琢句愈工作字不輟追襲
某人朝夕往還談笑恨不得從容其間以奉勝致但深慨歎終
解舟便獲展奉諸懇不復詳盡

又

近托楊元發奉書當徹左右相別忽復近一年雖有瞻見之期
蹭蹬輒未契向風可量傾跂秋高暑退日來起居何似更十許
日可以面懇當幸披寫

又

鄙陋于作詩尤非所工推僭過重率爾冒瀆不謂厚意遽勒之
石繭焉非據反深奉玷之愧曲蒙摹印為寄加之背軸精詣愈

增愧惕比來夜涼燈火可親南禪軟語展轉恍如到眼艤舟得地庶幾復有此幸也兄甚未暇周悉瞻跂瞻跂

又

日者先蒙枉問告以圖舟之策尤佩相予之厚輒如所命遂有可行之期感刻蓋非急欲見我豈如是尤愧盛眷為不易當也并候面謝

又

竊觀筆力愈勁麗欽歡不已新詩佳閱想朝夕于是咨請有期豫劇欽仰

又

累承寵顧牽迫未果叩謝亦未能相從周旋邑：常以為懷也乍冷清晨伏惟起居佳勝辱手示感愧容再叩之續奉聞事極毫末但人各有所見也徐弟尤荷展轉

與吳禹功主簿

伏蒙寵寄詩編讀之忽：疑是正元元和間人而抑揚頓挫老眼為督而不知首之屢肯也固非知音者乃辱假借如此感刻豈易披寫而珍藏為貴當與吳家共圖不朽獲承下風已復累年早時同寓尺寸地自可朝夕周旋而滯留今日遂有不及之嘆况瞻望數千百年後論世而尚友哉收之桑榆仰賴俯應適營葺暑居叢冗別當修染次瞻企瞻

又

相得殆累年矣而漠然姑得于往來寒溫間雖物色以謂必有過人者而披寫投懷曾未得其一二也末路何堪獲定于交游之後以其潦倒不振知自愛仰而已又不知高明所以見寓者何如哉方相接時固平：不甚款密別後繾綣幾不相捨未知古人真能如是否其見於傳記簡冊中則滋有愧于不逮也冰雪不渝更期晚節

又

累日幸相接竟不得少奉眷勤早來就別復不得一見固然無以為况向晚履况何似後當去此庶幾再來得以展叙

又

采石之遇已成陳迹足為嘉話遂欲因之不輟交馳投老何堪尚乘習氣之餘獲承超軼不謂初書已復鉏鋤方且偵伺為問以就紬繹來問燥然何異金篦之刮膜也已而趙君歸具能道動靜亦聞遠涉衝冒嘗移疾少日春物浸侈想見支頤吟諷日與融和為低昂拭目他時竊深企向

又

流落累年解后官所寓然一番搶攘遽促異地竟不能從容旦暮念之殊不知其味也論世尚友古人常想像于數千百年之後所以見其傾慕企金陵殆不容應接日思復尋野舍之樂特

未暇輟身以往只尺勝倍方且圖之初暄更希善愛

又

過歲更圖復去因入城一瞻見汨沒眼前殆不容撥置感歎不已日來職事優簡新政定須情通祿仕固不期此要亦常情低昂不得不尔也金陵畧無可喜處窮目力只了得人事俟少遣免即在治下庶幾得以展叙也一事勢不得已輒具公文仍屬趙彥強面致

又

近別伏惟起居佳勝三日太平居三得展奉固足以為感而一日病不能興一日登門不得見二者皆從容而勢輒見奪極不

滿意別來瞻跂尤不知所遣免日來大暑履况何似只尺未即會晤千萬加愛

又

比介還便作書適在紛擾中叙意踈畧頗蒙俯察已否忽：遂涉暑候早圖登門今則難于道路定應未遷召間能復見待乎欽跂欽跂專介枉教如對燕侶恭審日來侍奉起居佳勝佩服延挹弥激向慕其感不待言者才高位下前人所難孰謂枳棘終能安鸞鳳之棲耶瞻望軒展可量依向

又

近蒙專委迫行輟忙為對深恃惇愛亦審被差考試今必已歸

方春仍在下車之始政事一新人情孚洽體况當復何如相見無所不宜坐膺多祉也才高器博信所謂割鷄焉用牛刀隨遇低回少時即有遷召胡君遽歸不欲無書其詳俟後記

又

數月來家私窘感哭泣未間而疾病隨之治死營生窮于一力其勞弊搶攘殆不堪命非筆下所可形容惟見者知焉頃辱慰問以故未即為訴想在深亮比來應物養源發其緒餘已見于驚世絕俗之文而捐其土苴使老安少懷凡託治下者靡不得其所欽慕有自來于是尤劇傾邈少日或得躬叙繾綣向風不勝系吝

又

不通問又復月餘時有人來頗能道比日動止殊慰馳仰且審兼領理曹而推鞠甚多想勞區處有才為累平昔所嘆必有以裕如也秋熟日來体况佳適不晚或得會聚其諸非面不悉

又

新醞爨鵝皆村居所未嘗識忝冒珍貺固不遑而貪得忘愧輒已祇捧獨未果一覲滿飲大嚼揮毫疾于驟雨不勝系詠之至

姑溪居士文集卷第三十終

姑溪居士文集卷第三十一目錄

手簡

與吳禹功主簿

與吳禹功四首

答禹功

與吳禹功

與友人三首

答友人

與友人六首

答友人

與友人五首

答友人二首

與友人

姑溪居士文集卷第三十一目錄

姑溪居士文集卷第三十一

趙郡李之儀端叔

手簡

與吳禹功主簿

昨日專人歸上記當浼几下氣候益暄幾有暑天意象為况當復何似稍開塞疏堦以遣經寒蔚滯之倦遂迎三伏以故不無應接之勞小間便圖近次

又

近作書偶失投徹之便初意已沉浮矣比審已歸則鄙懷當幸塵浼方闖其然以冀申叙遽被專委情文兼盡固已不勝佩荷

而屬辭雅麗揮染勁秀又得之矜式為多感向奉：特未知所
借况也春寒不解途日恭惟尊履佳勝蹄涔之迫乃能暫寓而
略無纖芥可指以議者九萬里而圖南渠不信于今日哉竊寄
下風庶幾一息可附也如何

又

江上解后謂得後容少慰欣慕遠聞還轅悵然不知其况豈牢
落盛寒中勢不容少遷延耶尋欲作書屬風便徑歸以故未果
改歲伏惟動履清勝雨雪相仍春物頗遭抑勒一晴則不可遏
矣美才盛年自是當日有佳趣老人但貶得眼尔可笑亦可歎
也系詠勝晤倍深依仰

又

晚得從玉趾之末超軼絕塵每自嘆其不可及而曲記愛忘不
以莫齒不類為有間方且抑揚頓挫竊幸其先後不謂行色在
望一念所乘但深悵仰改歲已復初暑日來恭惟動止佳勝引
詠治下同在江上然順風揚舲杳未有此便臨筆不知其况也

又

別後即舉墓事用去歲一力酌對臘盡方少休閒承感屈弦歌
之樂雖常格所拘是亦一隅解后之福尔三月末徙家當塗旋
葺蝸陋數日來終息肩以故書問稍滯固知牽制不獲已要亦
在所矜照專介墜問疊：挽之不能斷冰霜下移信乎相悅于

我滋茂也感激愧佩無物以喻人品瑰爽似非鄙拙得以形容
要將擊節衆人之後以承峻擢愈遠千萬加愛

又

前書曲蒙寄示諸文紉繹妙悟感哉文章久不到此矣復熟不
已幾至成頌于今只在几案間意有不能遣則藉以當珍劑別
後佳製必已堆積雖入秦府庫眩奪不自持其如皆絕世之產
也安得一篇就得擊節于其側耶日來竭涸不異簪井辱寄縑
紉猶未有以塞白少須從容因以請教然極有愧于瑰意也

又

竊究盛文遂得周覽治下景物之勝追逐吟咲寔出幸過而羽
翰不傳咫尺千里春已去憑陵節物想多翰墨之傳繼此日有
來便之望亦當因之或自鞭策也

與友人往還

希韓昨日承見訪經宿尊候安勝不及別啟會次幸展轉異時
可以聯步相過并得奉教督寔為慰願狂斐得之一時偶氣類
所鍾因竊藉之以為請教之地而賤家鷄貴野雉遂有所取于
晚際紉繹高妙栗然汗下庶侵尋末軌以投自効其諸更冀委
曲掩覆無至咄：乎太甚也千萬見察

又

欽向有自來每以相遠不得接武披承為眷：于是特辱存顧

遂獲瞻拂色夷而親可畏而親者其在是乎別後資養之茂重
歎以為不可及也累日大熱又客至不已脩謝後時皇恐早來
伏惟起居佳勝無緣趨謁想蒙加照繼此尚得一再見否未敢
必冀傾跂無喻

又

春暉前日誤寫為迎春思詩或未用可貶付修完以稱題意或
參差亦不妨將錯就錯也一笑向須長春軒詩必是因花得名
轉錄奉呈日來勾屈俱達藻思低昂正當相與形容或已得錄
無惜開警延企延企

又

昨日承書累幅詳縟未暇披繹而家間失望何止交徧見責不
離于坐再遣來人亦于少室公處約畧想已塵浼晚來起居住
勝青詞謾輒注思元不知黃籙儀物所置與夫事之本末始如
醮叙致而已大匠不吝斧斤而礪栝之良工之側多曲木因有
論次得所模範乃未學之幸也遂即紬繹謹錄呈左右以勤斷
削如前干猥瑣正在滾沸中早得一出手如中流失舩一壺干
金也

又

天氣昏重老倦從而浸劇願見甚至而不能勉強良春也晚
來不審為况何似諸帖輒跋其後數日不暇及遂爾淹回想未

見訝德素名書也不可不使之出一隻眼丁希韓行筆有定力
殆進而不已者可示之因問老人之語頗適理否餘俟面承

又

秋物登行追隨正為勝日罪垢不擬汙人遂尔屏處眷言游舊
可勝跂仰不審履况復何似詩不欲違厚命奉一笑足矣不必
叅次成篇也尚冀解后瞻近少浣勤懇

又

晚來起居何似數次勉强起枕輒如在磨上欲候見遂不果跂
詠勝致但深繾綣前篇和納并元發明叔所賦得之皆盛作也
老者不度德不量力但有附驥尾之幸爾亂道來日錄上

又

濕熱不解早來起居住勝昨日幸獲款晤超然勝致警慰多矣
方圖上問辱手示銘佩增甚見委敬悉惡札豈足為用特不敢
不遵稟尔溪堂佳詞鋪寫精詣兼吐之于一時景物無毫髮不
盡不獨宛轉高妙攀跂莫及復喚索所遺亦不容措手勉投匠
手以丐斤削甚媿狂率少間元發家能俯同否

又

老倦素不工詩又久不作特與衲子輩代口鼓為戲尔不謂流
傳仰玷匠者更煩注思俯同借寵粃糠皇恐無地陋闥頓有此
獲真一時盛遇也詩固難工得來尤以為屠龍而不復振起欽

承高遠非止區、蒙被他佇面盡

又

早來起居住佳勝昨日過辱相求遂獲從容勤懇可勝愧佩昨日
睥睨曾不得一出氣竟至汗瀆珍藏皇恐不已細思誤用字處
須着改正如蚪作科隸作穎之類輒望從旁注出庶幾掩惡集
賢學士如堵牆觀我落筆中書堂以氣吞之尔勝人之語尚尔
脫錯區、如哀憊何一二日再上一面無限勝事而彥國不起
令人氣短

又

昨日承寵頤偶未食不果款留清晤良眷、也經昔體况復何

似佳句憑陵殆不容出手特不敢坐享連城之瑞尔雖不工重
以氣類尤覺牽強值飯數僧未獲叅候起居悚仄然勿廣為禱
一則掩惡二則不欲知為尚敢作文字也

又

久不獲展近瞻仰無喻初暄伏惟起居佳勝蒙手示爛然滿紙
讀之汗下但欽歎畏仰之不暇盖文章之盛久不到此矣哀陋
雖不足以擊節然管中之窺猶及一斑之幸也其梗槩若有所
辯訴者不謂流言一至于此是怪可怪果辱久要敢望安織不
動使三而後起者有愧于地下不勝願慕之至旦夕奉謁方有
客怨草略

又
晴日伏惟起居佳勝竹軒薄有意味或乘閑過此焚香試一種
新茶遂得少接勝晤適所欣幸

又

欽尉鄉評嘗謂早時踈畧似有以主之末路周旋豈無深念故
求田問舍所占于此為多亦有以見亮也更數日當暫歸冬初
復來獲遂登門上謁次地接闌闐而深閑自居每想見涇渭內
分而光塵無間非有本者豈能如是欽仰何已

又

多日不展奉伏惟起居佳勝梅花將盛嘗 景修或能展轉雅

舊一來同尋蘭皋餘味會上元齟齬而花亦未全折方佇朝夕
申致乃承暫入試闈不知何日定可出尚欲與花相期遷就高
明臨貺也率易咨稟

又

改月伏惟君子休有多祉昨日灼艾中書賜教并示近製雄文
呻吟方寤遂得超然別在境界信矣文章與造化爭功也前人
已有兩篇記曾過眼似不能藩籬是等格律尤為難工非屈原
宋玉未易與風雅爭衡漢儒頗盡心于此要之止是一時所尚
晉魏已後則無足論也李白數篇奔注汪洋自成一家不若退
之子厚僅埒西漢近時歐陽文忠公秋聲乃規摹李白其寔則

與劉得杜牧之相先後者東坡自以前後赤壁為得意不知馳騁前人當在是何步武間擊節高妙因幸垂教

又

承手示恭審晚來起居住勝蒙開諭曾門之盛渙然冰釋自是天聖七年因久廢此舉再下詔申之而先改定進卷乃召自此始耳咸平二年是真廟第一次科場陳堯咨榜也天聖七年下詔次年系王拱宸榜制策所中何泳是太常博士應賢良方正科富弼是布衣應茂才異等科弼第一泳第二此間無文字可攷既可疑須改動人頭處也如何如何不知曾門進卷是何等文字曾與不曾先改定乃召更煩見教拙語切不惜斤斧一出則掩覆不及乃所望于匠手也後日早訪及千萬千萬

又

蒙枉佳句佳作固所欽仰而愈和愈高至于長短抑揚罔然景歎未易彷彿其命意也急遣回介徐當牽課次第恐未盡真成疲駕之于駮驥也野外雖耳靜亦目前事隨分規處艱生如鹽車之足定斃于服勞之下矣良有愧于勝游欲到蕪湖踰年迄茲未契更須相見得少暫輟即附驥尾

又

魚軒必已無恙尊候亦計復常韋深道潘不愚李文郁各寫書不及致平時相見否東表近得少款必到家矣氣類斗別學莫

便乎近其人信矣詩人之美也深道千斛有甚次第莫似獼猴
賺鰐魚否萬一舟行之便自青山到庄亦不遠一相見了入城
路不甚迂非所敢望也火瓜細者城中無賣者得一百條已上
趁時收藏敢奉免否猥事非所以累交游難得此便只是須來
取錢雖微末要須適理尔非疎外也

姑溪居士文集卷第三十一終

姑溪居士文集卷第三十二目錄

手簡

與翟給事公遜

又與翟給事公遜

與翟給事三首

謝翟給事

與翟給事公遜

與楊明叔晦叔兄弟二首

與楊晦叔四首

與明叔七首

與彥文侍禁

與主簿秘校二首

姑溪居士文集卷第三十二目錄

姑溪居士文集卷第三十二

趙郡李之儀端叔

手簡

與翟給事公遜

皇恐上啟知府給事台坐不獲瞻望踰二十年德業日新譽望日隆而哀遲流落愈窘愈下勢地曼絕情雖欲通其可得乎間承出膺藩服近在咫尺終不敢輒脩記室之問其如疇昔之念固不捨光明亦妄意氣類之猶在也秋晚浸寒日來恭惟台候起居萬福道義紬繹體用宏博方時豈有居其右者抑揚消長自與造物者宜契而僉允所期天人其遠哉日聳降制益邁伊

周之蘊上符聖學永為斯文之助

又

皇恐上啟知府鈐轄給事台坐久欲申候記室于不自果哀
晚淪廢詎敢晞光疇昔端恐有玷美玉末路狂僭固知得度未
遽擯絕故妄意一歎之及遂辱專委備形懇惻醢雞覆發未論
大全為未始見追說展轉不能自己霜候浸寒恭審台候起居
萬福竊承前驅已戒一代人物聳動所過即幸從邦人後瞻望
道次分慰不易得之遇亦意破甑弊帚猶獲一願之寵也

又

款承旦暮既已斷舌妄計便道參近猶幸桑榆之得加之帥幙

鼎盛較舊鎮不遠一兩驛自是竊借光明時得修叙蓋非苟然
而然也但慮席未及暖宣命已在門矣來使促歸甚迫殊愧疎
畧

又

每到田間邂逅地當舊鎮往來之側時能引睇如望星日初計
鋒車或尋吳中前日之路又竊覲幸舟行便道于此乃心排進
幾不知所堪已而聞淮西擇帥就煩開府則遂有必得親近之
幸賜教果如所期豈勝欣跂欽佇侍坐并叙繾綣

又

某欲為宣城之居者累年矣亦營得數椽地方議遷徙而承被

命遠近莫不見慶此特他人妄意尔亦未知門下餘塵尚容擁
簪已否久須覈問稍通乃期款晤然後俯慰依投之幸忽：易
成蹭蹬竊謂素所欽挹遂委諸草莽竟茲猶豫寔未嘗斯須忘
念也近黃大臨元明出所手書中獲奉批誨則不腆所味蓋剪
剪之各尔歎焉追訟未知所以借况方圖問道遽聞被召殆似
有以司之終不得仰承旦莫其如一介之私詎應懷之沒齒故
輒低回筆下庶幾省察

又

伏蒙寵寄佳醞大府上樽豈寒鄉所應得祇服盛意倍深榮感
不敢別具公書上謝想荷矜炤

又

太夫人恭惟尊候萬福貴聚均慶伯壽兄未及書已赴官鎮江
否英偉之姿宏遠之識欽嘆不已近見和韓子蒼諸詩并評史
六論筆勢縱橫如洪河決九衢老憊憊然知莫追也今幾孫矣
僭易及之

與楊晦叔明叔兄弟

別後累承書所以欽承歲晚固知冰雪不渝初不許慶侍遽歸
前此鄉人無有見告者久之方聞已愧申叙之緩首蒙晦叔墜
教乃審行李在青山有專人在此叩之云已歸嗣圖上記竊恐
未見而以書于礼為簡含糊至今未始忘也晦叔簡中代承見

及固不出于雅意然示感愧無喻雪寒伏惟侍奉萬福還家當叩門第不勝愧：輒有所違而致其曲亦投分有來不應小文自楷也

又

位中貴眷萬福郎娘今幾人想皆成立矣別後相遠書不以時或聞已為蘄黃間居初亦竊疑比承捨舟乃信所聞之妄里中無復往還如載發見之亦有時十三四年居此日益退縮苟安似是老味自應尔也見仲既歸可以復理故輒不審門避之迹猶在否

又

去夏徂秋一向窘于異地涉冬寒甚雪至五六尺今猶未減重裘頗于杜門為宜然春事不無所妨亦不知節物之來去眷懷參陪之際只着意江梅至數十闕不已醉笑扶攜幾無虛日今則如一斷夢時：卷軸間得之未始不引歎直視也日來交游僅有君俞尔元載數步地累月不一相見元發往高郵未歸其諸藐如路人似亦不足怪也筆次偶及之

又

脾氣作梗忽：少况且去矣不應阻濶如是但有愧跂獨處必甚寬涼幽寂頗得趨于白雪甌中否晚來復何似頃借書數種已多時偶打疊方檢足謹歸書館因循何罪蒙見察甚幸

又

異鄉邂逅寔我雅契見似人而喜固已知所歸向而明爽敏茂動輒與意等則拳、相與之心宜如何哉方將歲晚周旋不謂遽尔阻濶戀別躊躇或未見其戚而別後固然殆不知其所况也累約明叔圖作便記竟先遣問以所拊循之厚尤極感愧日來漸成安居計惟無入而不自得又復寮窠多可人則况味日佳當過所期遠甚何時少話離索方暑千萬加愛

又

前日不謂郊外少留甚恨不得與餞客之末尤為不足日、暑雨不解山漏下滄宛轉數尺地生意從可知已雖元載元發明

叔相見動十許日其諸悉已阻絕老味益衰可勝繾綣台下涉吳中氣象風物飲食當不與此同日語美才在事所倚宜應接少暇然亦不廢過後吟嘯之適已否胡茂恭我輩人也閑居中必蒙頽恤更為周盡甚幸

又

衰陋淪落寔得欽承于弛擔之初回旋淹久所以惇隆負籍日盛一日晚節出處岨嶮迹雖如是而拳、不少間斷然相從則當無曠日既別則音驛繼修此常情之所必致其如理有適會事無偏吝故吾黨元不在形骸之內是以論世尚友非崎嶇尺寸之窘可據竊計疇昔儻能見委而不腆敝志亦幸粗伸于今

日也尔來家居不異老蚕漸圖纏結以投作蠶碩一報緣中其得亦已多惟溺感者不謀其正而務進取是役定應究竟之謂何邪何時促膝握手以快擊節向風倍深依仰

又

別後紛紜終冒寬典寔出至幸老境得安田畝飽食杜門不廢圖史之奉更復何求但交游浸疎間欲披寫則難其地以故平日之懷尤為系吝中間或傳瑞鶴翔集昭示美政前日三異與夫鳳皇來下乃表見于曠久聖日所期想已上報將有不次之命矣積累之効因表見于斯時也欽企欽企佇承騰布別圖馳慶次

又

蹄涔苟生僅知所得之况欲強分寸則勢甚于登天室遠心存居常自歎且恨無術以縮地也申記不忘書問過委豈真有所符故是念雖數千萬里常如一堂之上邪佩荷之深不講可諒歲晏凝冰日來侍奉起居萬福如君尚尔殆不容一毫髮于實力益勵壯圖行被超擢

又

頃每得書如奉更僕竊計歲月謂受代已多日始輒疑其緩乃有傳者云結姻蘄黃間名族遂留家矣方圖審諦修馳不虞舟御已屆來者亦不乏略不及之其不敏則殆不知所控也忽披

手示大締謹字推輩見嚴恭焉何堪祇佩惟愧其倦：所素遠
落第二則幾若自據于炉炭之上矣日來舍館已定否百懷非
展晤莫究老懶久廢裁削具報踈率皇恐滋甚

又

久別且相遠馳情固不忘而書問不能相襲于其中間亦屢獲
枉誨因而得以申叙自非委曲見求豈得交修相盡款承歲晚
何以為控感寒伏惟侍奉起居佳勝野舍低徊輒累月缺甃僂
俛姑以寂寞自康尔還家首幸披展介還聊布其畧

又

浸冷恭惟尊履萬福艱生不能他委殆類一日不作一日不得
食：之固無所得其如不得而棄之何自審營奉極力正是交
游任責之時而獨窘于牽制慙負已不貲曲蒙招延滋畏深厚
二十日正在滾沸之際殆尺寸不容稍遠恭候引緩以至前一
日皆當趨詣臨嶮則素志也想辱深亮

又

少別未及書問適無便故亦不虞還軒人遠也偶乍自庄上歸
目前如蝟毛然解后恭承未遑繼修謁方切頌之忽披手示欽
認增感晦寒恭惟起居佳勝早晚再圖瞻近介還草率皇恐

與俞秘校

自去冬南去即不與北事相接比歸亦不復可得不審涉春有

以自樂否成書者不得期程已有序何日可西上公所謂信道
篤而自知明者淹回歲晚不失為楊子雲更祈自厚以永終譽
新詩寵及益見作者之高興坐汨塵空徒能諷詠之無窮也感
服自餘頻寄報問

與彥文侍禁

久別遂此瞻近恍然疇昔頓還舊觀流落異方警慰茲可涯耶
早來再候舟次竊承在禪比就展復相失快詠尤不能已溫熱
晚來伏惟起居佳勝曛夕具記竦報姑報重意之辱他佇躬致
與主簿秘校
早與君祥遊與承高明為可畏契濶淹久叅近遂尔不逮鄙懷

常若有所負也于是獲奉餘庇三月矣尚未果申致少叙疇昔
來問遽臨滋愧其晚寒候恭惟尊体動止萬福美才乃勃宰不
耀要地不得為無罪行有知者經席顯用豈碌：常格可限哉
未聞千萬加愛

又

鄙拙再依餘庇方謂未有叅承之便遽茲邂逅慰拊可知于其
既別復欲作書申叙又蒙先枉翰墨慙負諄懃益深不逮之責
更書定何時可能知新正否區：止候事稍就緒敬當公檄治
下紛然滿前裁極草略千萬矜察

姑溪居士文集卷第三十二終

姑溪居士文集卷第三十三目錄

手簡

與霍子惠迪二首

答霍惠迪

與霍惠迪三首

謝霍惠迪

與王居端四首

與董無求

又與無求二首

與董無求四首

答董無求二首

與何知縣慶長

再與何慶長

又與何慶長

姑溪居士文集卷第三十三目錄

姑溪居士文集卷第三十三

趙郡李之儀端叔

手簡

與霍子惠迪

棲遲江上濱三年矣罪垢未洗不敢輒自齒于一時賢士大夫之間眷懷好義之勤固無毫髮間斷德譽藹然每恨相從之晚于是遽先翰墨所以推借甚寵而仰求見予之自似是傳聞不能無過亦或奉告者率多溢詞也欽佩盛意但深恐悚歲杪苦寒比日不審燕居体况何似瞻望絕百餘里杳未有款近之期遡風可勝跂詠介還甚速殊不盡鄙懷尚覬嗣音

又

兒童時道金陵周覽勝致悵然如與古人晤語方時
日艤舟之頃而今日不異掌握間人存地靈苟得從容指顧之
餘則可慕可歎可嘆可閔班、寔同所寓竊承無復世顧一意
文詞翰墨間日與雲烟魚鳥追逐先後因而自記于組績款詠
之際想象超軼尤恨羽翰之不我借也

又

蒙諭作字固好之而終不能彷彿來貺凌轢遂獲紬繹妙趣真
我師法也近日米芾元章可與正元元和間人相上下頗得其
講貫否尔後可以時復交馳盖不待相見而後深契也表德音

書下論庶幾見錄于遊從之末以託久要愧企愧企

又

眷聚無恙容易上問金陵諸禪老多奇者必常過從相樂故人
李正夫子無咎美奘克肖醫中成德餘無一點塵埃近得之于
一舟往來間尔觸類以求則勝氣無所不在何時相與周旋物
色以投警遇臨筆眷：

又

欽慕高遠咫尺未得奉殷勤披寫相畫畝焉此懷惟付之有
而內訢所乘則未易如是也三月被問四月張君佐出所予別
紙遂温前所賜始欲展轉敘致既而勢可以出入函圖一見門

下疊：之念期必一售不謂皆在不可形迹未忘吾罪多矣竊
應掃軌 春分從謝絕專介忽領來貺擢髮不足以書其罪則
所謂多者曾何足以名之邪系詠寬博臨筆語塞

又

凡此諸况德餘書中略見梗槩比來病困意味殊惡累日用醫
今早方出應接稍湏完養或得一踐素期是乃疇昔之所欣願
也貢書蚤晚如著令一方得人之盛固不能先高明穎者先出
不獨古人之賢力疾具問極減裂寒暄不常倍希保畱

又

蒙委諭書墓榜強所不能寔愧有玷先烈尋寫下再閱之不甚

滿意因循未能再作便當率率奉命後時之罪庶幾寬假

與王居瑞

久聞樂義盡養為鄉里之所欽挹因名自激已有瞻承晚矣之
負于是首辱枉頌：所得何從致之過聽不遺但有愧向不圖
方有所役勢不得展叙綢繆申繹加貺歆焉自疾殆不知所容
措別來起居復何似非晚登門款布感遇未聞更期以時善衛

又

一水不為遠不謂今日終得識面又復忽遽不能粗申所懷仰
愧屈臨殆不知所容措尚幸不晚登聞庶獲詳盡燕壽勝緣得
結高義何慰如之但拙陋不足以形容僅得不虛來命尔皇恐

皇恐

又

聞風久矣一水獨瞻見之晚系懷可知晚來就况佳適承在邸
中未果俟謁來日早望訪及家冷容易

又

久不相聞昨日邂逅尊翁方知己叅告辱手示伏審晚來為况
佳勝詩闕遂蒙開發老來易得齒軟欲勉強少乘其味輒不能
謹歸上異時或得擊節緒餘庶幾一嚮知鼎也出沐可以相見
否

與董無求

自夏徂秋競傳行李將歸迎侍朝夕伺問覲得一瞻奉間被來
報乃審勢地崇峻不容自輟以便所私雖選任為可喜而遂阻
面敘可勝系吝感寒日來起居復何似履歷如是無異乘長風
破萬里浪雖欲少却其可得哉更蘄重愛前對異數新正不果
為壽倍深祝詠

又

累年江上相從每見未嘗不嘆息久之風骨非塵埃中人而留
滯許久果茲進擢其慰浣可應只尺論耶尊夫人貴眷既到必
遂安居京師乍到不無與意參差處半年已後方有况頃所備
諸不然安得一坐十七八年也拙陋平：人復其味猶如此况

美才朝夕要近恩數之來將不可遏則未易先後形容荷相知之深惟恨山不高尔太平丁君文學行義之士必去相見敢望委曲為應

又

里巷落寞久不修馳中間思道子椿繼至奉手筆礼重意勤弥佩歲晚尋圖申敘而家私疾病相仍生計漂溺一力酬對其能收所裕以究願布之懷和繾綣不舍我勞如何日來樂職奉親履况何似美譽益隆遂將濶步華要為一時之所歆艷茶烏何堪劇增欽系

又

比會二公脩承際遇之盛平日固奉期如此屢曾面聞矣然自比超特乃其基漸也神和氣秀表裏如一自是二三地位更宜靜以待之近聞修建合宮之地稀濶盛典主人為妙選想已在延辟續當馳慶次

又

比得佳篇欽嘆不知其已想今又更超邈資養有來宜其一出便在人上也別藁有餘無吝開發為別易久蹭蹬不獲奉問每過北律見壁間字如獲接奉以故懷思不少忘也秋高日來起居何似為祿不屑冗瑣古人固以是踔厲自起取功名致高遠奉期非只尺更希加愛俯契勤禱

又

比有去此之期日計瞻晤得以自慰專介忽辱惠書札數過厚
感愧無已行筆非復昔日幾自成一家之學矣切幸周旋以博
不逮冗甚恕草：

又

久以多事不果通問眷言雅好不忘欽挹間承恩數優異但有
欣慕而常情所當先者朝夕是懷竟亦逮撥其歸行路或在見
亮况疇昔之所蒙者邪庚伏迨日雍容美踐居 贈勝初路之
翼方屢振以乘遠舉故九萬里而圖南將所願不可望矣魚鳥
間無以自寄其生特于是時借傳聞以投慶慰向風罔然揮汗

殊不謹肅

又

伏承繼被寵數遂膺簡在是有以致之適茲相值尔欽仰欽仰
久以多事尋失修慶悚息都下既久况味不與外方等盛年正
宜奮勉以席享運况共事皆氣類也非晚果成此去定獲款近
大暑未暇周急思企思企

又

諸君倡和詩猶未得披覽不謂衰朽亦在記錄寔為欣幸也或
蒙不鄙得盡餘藁豈非至願

與何知縣慶長

哀晚流落寔門下舊物欽詠超特固知典刑所鍾而參承之幸
不謂蹉跎以至今日仰佩存錄不獨有慰疇昔而至誠俯格似
非一報緣中所能致者每一念及未始不愕眙自失求其因而
不可得必歸于如是也少別共惟尊候起居佳勝高才遠器正
自有所歸惟是未即旦暮親依可量傾溯瞻望款席倍深繾綣

又

孤苦孱露強顏世軌操二十年遷奉之心窮高素深足蠶髀消
而坐增感歎亦已屢矣不因天假之便寔鍾盛義自得卜至于
就寔殆無一毫髮可憾而周旋委曲多先鄙意而為之地雖已
累形遭遇不可忘之誠然興言每及必屑涕徬徨而不已仰惟

泉下積累之厚其必有兆于傑敏在其他事固不可易以負荷
况大事成就如如此耶婦語家人無問幼賤莫不手加額上嗟嘆
相勞凡所聞皆謂度越數千百年豈復有斯人也行當刻石以
詔不朽執筆可勝系吝

又

逼歲到家即欲遣人修謝以去此差久一番酬對不容少自輟
荏苒稽緩慙悚無已大札後日有餘暇府政必在遷召之次雖
邦人重惜其去然勢恐不能復借以留審如是則迴避之嫌可
遂寢私淑恩眷于是不得而兼亦冀近承大馮德澤所被而遠
依小馮陶冶之賜也不勝朝夕跂頌之至

姑溪居士文集卷第三十三終

姑溪居士文集卷第三十四目錄

手簡

與洪覺範

與明祖印二首

謝明祖印

與明祖印二首

與資福堂頭三首

與珪首座

又與珪首座四首

與政書記平叔

與崇因欽長老三首

謝崇因欽長老

與天寧訾老

與吉祥聰老

與資福慈愛深禪師

又與深禪師

姑溪居士文集卷第三十四目錄

姑溪居士文集卷第三十四

趙郡李之儀端叔

手簡

與洪覺範

新正伏惟道履增勝世境所期敢伸善頌逼節自太平葬事歸
奉九月中所寄書恭審相府有請復見本來之相過煩委諭固
非所堪而致慶常短未免輒乘末軌要之亦是幻中一事似可
喜也書未得間邂逅入京之便嘗草略布敘竊計發封不能無
疑尔日來為况復何似自是稍安家居日得通問次瞻跂之勤
臨紙尤不能已

與明祖印

十年于此欲一到山中尚尔蹭蹬况本分人在焉其可輒自緩邪以所期于日前猶有其數則妙悟周旋豈人事得而計也每念及之固然不忘其味窮臘氣候將變庶幾春物爛發獲從候虫時鳥飛鳴跳躍以乘物外之樂前履新正不敢以俗礼自勉伏惟對時受慶

又

不相見動踰數月世蹄間如蜂窠蟻垤擾：自營之不暇雖德道高風不忘依詠而隨念有所形容則未嘗不臨紙見奪浩然感嘆之不已也歲杪感寒共惟起居勝常老境又添一歲輪迴

亦是一事安得明空軟火從容霜日以承解脫警策之悟糸仰拳：非筆下可究適有田間之行殊愧踈畧

又

劬勞之日伏蒙示遺專委經疏壽香時果曲形贊祝哀晚何堪豈足辱記錄之如是至于親寓翰墨展轉資藉祇奉增畏未知何以為稱也感激滋甚或云故事當屈軒從一到州中審然遂得一面為慰書所不能載者當幸披拂以境

又

送石楠人回奉書計已塵浼漸有寒色山中之樂如何伏惟所履佳勝暫過湖州十日為歸期迤邐圖詣左右次逼行草率至

愧

又

晚來承訪別忽遽不獲寬論入夜欲再奉晤兩大作跬步亦艱殊悵仰也伏惟起居佳勝來日必不行當幸披展繁昌雪五寸如到彼小缶分珍壓瘴疫乃一良藥也况瀆為愧

與資福堂頭

頃蒙專介枉教巨軸累張率皆相期過情之語雖剪為弗類未易為據而欽承勤腆祇佩為愧道場日盛學者至奔走天下而化綦莽為兜率內宮是苟然者邪作禮未涯日劇系詠

又

伏聞一時勝流多會席下固知有以攝受而因緣至此更復何求昔人彤弓旅矢不為有矣渠不諒哉欽嘆欽嘆哀病涉秋稍能扶持但舉動未免須人故作客不無過慮須更少日粗涉安健即圖一展奉次時不可失業根奈何

又

麻帝之貺繼枉厚意然亦何用藉手之過又不敢不留皇恐皇恐碑文背軸為奇莊嚴其飾而復修以多本感刻感刻茶匙乃鉢囊舊物亦聞久而未識此則尤為珍惠也

與珪首座

流落窮遠幾聞足音而喜高義鼎來已出度外而示出定相不

覺汗下從容促膝初不謂所得乃如是之富其為欣幸未易只
尺可論別後日期作書因循未速專介遠至累幅相先紬繹眷
勤可量銘佩恭審涉夏以來動履清勝裁報稽遲負愧何已想
必諒其懈怠也

又

欽承以正坐元本分會中須其人當此位但極聳嘆政兄日夕
會聚其樂何涯以主人之賢而諸高德遂同一席下而又有
時人物常與往還地當要衝戶外之履填委信心所廣是亦垂
手方便漸冷稍安他佇面款

又

日者不問巨浸一葦見臨特意所隆懷德滋重至于超出世表
寔相期于翰墨中則佛法人事一時俱了眷言欣慕十日猶恨
促別之遽也別來欲作書偶將有所遣故未暇及尚尔蹭蹬馳
情可涯日來体况復何似只尺定將再有周旋之幸已否逆風
耿：

又

落莫弗類缺甃生涯苟為日復一日事耳昂然相頷遂得一快
意于談笑文字之間久無是境界矣其慰怍宜如何哉別後有
雨雪懸知必屆華藏欲圖修叙而不及到家在何時斬新福地
得吾人數君子相與表發天其成就此地將邂逅崛起慰人望

之深邪家居為况不佳何時一笑周旋有間頻冀流問

又

昨日不堪款然雪中無聊所得亦多矣早來為况何如以病作都不曾周旋更俟齒疾稍瘳也少間且過此喫麵比之天寧餅似差勝耳一笑睡不着和得張敏叔詩謾錄呈冷金乃此紙也未研白者尤佳乃小白者但不精耳少間面奉

與政書記平叔

秋漸涼伏惟起居清勝中間專人至蒙惠書并見寄與少馮佳篇感激厚意無任媿服適以失一二十餘歲孫子追念不能已正在哀荒中不能為答其後疾病相尋飲食頓減加之遂涉暑

候奄：如泉下人亟欲牽強裁叙終不能如意但引睇傾懷慙負不暫釋尔計亦有以亮之與世相忘久矣獨得于世外諸人不能捨去然倍衆佛事因而体究歸宿乃是素計亦覺境界頗熟非一世所習而業報纏繞墮此機穽竟至不復出頭然不出頭間輒時自懺悔作來世解脫之念其于妄言綺語遊戲所得姑用以排遣豈足為文：亦何名詩不圖流落為作者之所收采如高明即叩作者之域何啻所願望不及端如劉夢得序靈徹詩而錄其徑來白馬寺僧到赤烏年及青蠅為吊客黃犬附家書之句也未與元白相見時得吾友已詳元白來即加詳滋恨未即周旋也要之我輩相投固不待見：亦有其時得一念

常在足以為慰資福日來愈盛來者無不贊嘆修建漸完備此亦世間事無足低昂惟不易得者諸上善人俱會一處想像斯語今建斯他苟病少間拏舟一昔便在目前但不使作謝靈運幸甚

與崇因欽長老

張子偉來意斯人雅涉叢林又久在金陵必能深款妙悟比叩之輒云未始相及固已重歎潛德不耀高出流輩竊謂如此正宜抑揚末法紹興祖令閑中但自咄：辱來示方審果契私念正論所歸詎可回跂于必以力勝者和滋畏得之已晚而不果先事一致鄙勤也雄辨堅力濟之以垂手不倦相見會下不異

覺城東際真一時盛事也未果修敬香火尤劇系詠

又

屏處淹及閱歲初失咨承致先寵問雖重愧不敏而世外高風尤及跂頌久之方克具記踈懶固不可錄亦方時往來常檢以脫畧然慙負眷懃未能遽至忘念也專介被手墨疊：數幅殆無一字虛設冰雪不渝倍深聳慕大暑敬審日來道味增勝只尺未有周旋之期臨筆耿：

又

到此數與天禧通懃亦常及叢林疇昔其報甚悉何為軌遺吾兄雖不敏之責不可逃然天禧亦當分一半伏讀來示栗然

汗下金陵佳處想日有勝踐未果杖履周旋庶幾翰墨塵迹時
有一笑之地如何如何

又

麻紙新綿御米皆珍物也見遇如此被賜增感乍出世應接處
多荷煩致厚過寵愧哉愧哉

與天寧訶老

別後累作書終一奉來貺然常聞動靜知山居甚優裕計書來
不過如是而拳、所系亦在此也伏審迩來体况休勝老境不
異平時報緣渠可逃哉姑兀、待盡而已乘興即遂瞻叩未間
糠粕形容不妨一面之慰

與吉祥聰老

相別又復許日扶病還家至路西奉專人所貺書存問勤懇非
慈慙故豈能如是伏審起居康勝眷事舟車往來正當盛時欽
承遵化而藏輪轂不少輒亦福慧雙修人事自相應耳過節或
得瞻奉

與資福慈愛溪禪師

伏承暫歸不得暇奉侍然本求脫離生死于道如是迺本分用
心也禪師書中亦頗贊歎精進甚善甚善永至又承書遂審体
力佳健如聞非晚遊歷更宜子細只是此事何須繫峭草鞋若
疑情已脫直下便是道場所不易得者師資之地耳無由會晤

傾系傾系

又

瞻望門地不忘歸向慈光所臨隨處蒙庇秋高伏惟起居佳勝
欲見未可得障礙自窘遡風增歎

姑溪居士文集卷第三十四終

姑溪居士文集卷第三十五目錄

序

折渭州文集序

送鄭穎叔入京序

張覺夫字序

夾山語錄序

祥瑛上人字序

送戴道人序并詩

姑溪居士文集卷第三十五目錄

姑溪居士文集卷第三十五

序

折渭州文集序

趙郡李之儀端叔

師曠之聰離婁之明非得之天則豈能見之于視聽庖丁之解牛輪扁之斲輪非得之心則豈能應之于手其用雖不同要之非勉強而至者也昔之能文之士亦莫不然司馬相如楊雄之于詞賦司馬遷劉向之于叙事李陵蘇武之于詩是以其所長自得而因其所自得者發之于言耳至于離婁之視不能代師曠之聰輪扁庖丁不能互任其手故能叙事者未必工于詩而

善詞賦者未必達于叙事蓋各有所專而其他雖通終不得而勝也諸葛孔明崎嶇戎馬間本以經綸為事而出師表木欒曲讀之者不得而優劣豈任重邁遠之氣開物成務之才不期于言而言自至非若視聽與手足與諸能文者系于一偏而不可以交舉而相先信矣天下之奇才也公生將家便馬善射制勝料敵乃其所事而文詞論議駁欲與古作者並驅爭馳豈非天得而心通之忠義激于中利害動于外亦不自知其抑揚頓挫交舉相先而見于筆下耶于是知公于前人幾可以無愧矣既以世業遺其子彥野屢立戰功嶄然出頭角號名將彥質介之遵公所令篤于藝學妙蘊而英發落筆即在人上天子得其所為文而欲遂易文階又使從天祿石渠之遊殆若王梁造父秣驥子而問途其志氣已在萬里外矣公薨介之緝公遺藁得詩若干陰符經頌一邊議若干奏議若干摠為若干卷藏于家而以序見屬公一時偉人也功在朝廷名在四夷德澤被于所至之地而軍民如赤子之慕父復其言皆足以聳動後世不止苟為文詞之工而已豈待予言而後傳邪然予辱公知為深竊幸託名其傳故不得而辭也

送鄭穎叔入京序

物所聚則為富、而特異則為貴天地萃和之氣無不在也蓋有所專焉故四方之產不同而于其所專則斯可以貴矣于其

貴又聚而為富則終一二數而於其所富之品卓然絕出者惟
信一州尔于一州又有所產之地為貴溪是也凡產于其地者
金銀水晶空青石碌怪竒偉麗之物是皆得而用之雖貴則富
苟為所用則尚安得而貴哉惟能用其貴然後為

不曰

其人歟予私疑夫明天子在上闢三舍教養天下士舉三代之
墜典而嗣成先志而歲貢特信未有以異于他州豈其怪竒偉
麗之物勝而有以掩之邪蓋怪竒偉麗之物天融地結非一朝
夕而成况人也哉亦必待時而後出是不獨貴其富抑亦貴其
貴也予得罪居太平既歸道金陵樂其江山風物而不能去因
家焉間以事來太平久之遂有生遊死葬之意解后貴溪鄭君

穎叔為州學教授時得一接語則魁然若不可得而同淵然若
不可得而測既徙家焉乃得屢從之游而予所舍適在天寧寺
側穎叔投閑多過其地予得從容襲之則前所謂不可者非難
同也蓋有所觀焉非難測也蓋有所擇焉觀與擇予固不足以
當之而似有以見委之重則予私淑諸人而夷攷之則高明疏
通練達而不苟殆非規之于尺寸錙銖之近者已而訪其在事
之詳則强者下之弱者振之程校低昂如權衡之于輕重不踰
繩墨而學者得肆其才隨所區別而條制舉適其用上能承教
養之義下能合同異之衆信乎能用其貴而貴其所貴者也夫
貴其所貴矣其于人也孰禦焉比受代將如京師方明天子網

羅俊傑極天下之選而布之周旋行穎叔之貴必有識而薦之
于上者予獨慮予所私淑與夷改之而信者或未盡知故于其
行序而申之以告夫識之者以備顧問之所及

張覺夫字序

自形之下者言之高者必曰山深者必曰海謂山高幾尺海深
幾丈則未免于億計要之終不出于度量則捨尺與丈何適乎
至于錙銖毫髮不差則妄矣山果高幾尺海果深幾丈耶惟古
人真積力久推其自得之學以就聖人之事業則未始不若合
符節聖人之事固不可以形論則終見之于形者以其器耳以
形而論如山之高海之深猶謂之億計而聖人之事業乃如是

是器不可以易也今夫曲直長短圓方大小置之安則安置之
危則危左右上下惟吾所命此器之不易者渠不信哉伊尹耕
于有莘之野曰予天民之先覺也匹夫匹婦有不被堯舜之澤
者如已推而內之溝中其自任以天下之重如此其器也方
夏德之衰桀之不道人知其必亡猶就之就之而不售則去而
之湯比五就而卒為湯所用何哉非不知桀之不足與有為也
猶幸我君之或能用我桀乃湯也湯非不知伊尹也亦五就而
後用君子未嘗不謹未嘗不待時而後動知伊尹之必能相予
弔民伐罪亦必至于五而後用既用矣蓋有所待也其後果咸
有一德克享天心遂濟其美以成其事業則其自任之重得不

謂之若合符節耶非獨伊尹也凡學者莫不由此故曰學之為王者事其已久矣堯舜禹湯文武汲之仲尼皇之其已久矣學之不為王者事不得謂之學零陵張君仲先字覺夫以其名問其字于余、以是告之覺夫明爽高秀雖在場屋而不專為場屋之學旁探密取自殖物而名之將種、皆入吾用而後已家世以文章行義表見士大夫間零陵之張海外率知之而覺夫乃資其天得以負荷家之傳故擴而達之以見于事業則夫名之所因字之所訓其可得而已耶苟不已矣則伊尹之志其遠哉勉之余將拭目以俟崇寧五年五月二十八日姑溪居士序

夾山語錄序

以如是因得如是果作如是見說如是法不離當處而盡未來際由無始有以至遍周沙界然皆本于如是然雖如是有一絲頭即是一絲頭又况一問一答提唱展演若偈若頌者哉夾山長老既以如是來復以如是去又以是而再住為日既久隨時是現因物流布門人緝之以為後錄乃相謀曰我師之道既已行矣其說不可以不廣遂命工鏤板將使在、處、皆得而有之鑽龜打瓦固知是成佛作祖亦于是或曰隨緣應感靡不周何假此而後廣邪曰以色見我以音聲求我皆非所以見夾山也然則夾山何從而見邪如是如是

祥瑛上人字序

古之人所以自厚重其字者誠以其賢否醜美必常與名字相上下而始終昔邾婁片善可稱春秋褒之曰儀久解者謂名不如字以為極美之談故孔子作春秋記人之行事或名之或字之皆因其行事之善惡而貴賤之是以二百四十二年之間字而不名者十二人而已祥瑛上人欲更其字数以名來請告之曰許慎云瑛光瑩玉色也夫充寔之謂美瑛則美之盡也推此則瑛乃瓊之精其光瑩特可見矣宜字之曰瑩中瑩中上人少啟禪關得佛三昧異日高提祖印特未可量也然其心地真淨明妙虛徹靈通揮然而瑩于中又豈能掩之哉庶幾不失其貴者歟戊戌三月六日姑溪老農書

送戴道人序并詩

戴道人金陵富家家破得命術與常所論者不同學士大夫多從授其術者所論不差毫髮奉祖母由廬山涉江州南康軍蕪湖縣久之凡沿江諸名士待之如朋友一口稱其長且譽其為人過太平予一見知其不凡已而稱譽繼至予所不自知者壽而晚日可期固不足問又無志思以同授者然心寔愛之眷眷不欲其去既告別輒作詩送之并示其所向所負如此而汨沒于窮荒以老良可惜也政和二年二月二十日姑溪老人

詩

懶將身世問窮通邂逅僧軒一席同已歎故家如墜葉可堪白

髮共飄蓬冥搜固出能言外妙用都歸指掌中咫尺京師莫辭
遠有雲何患不乘風

姑溪居士文集卷第三十五終

書